

Parlamentario Lopez Tromp no a tuma desicion ainda Pero Partido MEP definitivamente no ta un opcion mas

Parlamentario independiente Marisol Lopez Tromp ainda no ta laga los kico ta su plannan pa loke ta eleccion e aña aki. Tin hopi rumornan ta bai rond encuan to e diferente posibilidadnan cu e veterano den politica tin, pero e mes no ta bisa nada concreto. Speculacionnan ta cu Lopez Tromp lo subi riba lista di un partido existente y e rumornan ta insistente cu lo ta trata aki di partido AVP. Di otro banda por tende cu e Parlamentario lo ta bai riba e lista di Democracia Real ya cu esey ta loke hopi di su campañadonan y votadornan lo ta

prefera. Por ultimo por tende cu e entusiasmo ta asina grandi cu Lopez Tromp lo lanta su mesun partido politico pa yena e bashi existente awoki unda cu hopi hende ta desea algo nobo y no kier vota pa partidonan existente. Den entrevista cu Marisol Lopez Tromp mes, e Parlamentario no ta bisa nada ainda di ki desicion el a tuma y ta enfocando riba e trabounan actual cu e tin como Parlamentario. E ta bisa di ta enfoca riba e reunionnan cu ainda mester wordo trata den Parlamento. Aña pasa caba tabatin basta punto cu a wordo trata den e

reunionnan publico y tin ainda diferente cu ta pendiente. E aña aki ta uno interesante politicamente y cada dia lo tin desaroyonan nobo cu lo conduci na e luna di eleccion. Por papia y premira hopi cos pero ta na ultimo momento desicionnan lo wordo tuma. E retonan mas grandi na e momentonan aki ta den Parlamento ya cu awor e ta representando su casi 3mil votadornan y e tin cu cumpli cu nan y representanan debidamente. Dimes e ta pensando si kico ta su destino politico y e aña aki lo ta uno di desicionnan clave. E Parlamentario a splica



si cu p'e un partido politico no ta un destinacion sino mas bien un metodo pa jega na un meta. Un medio pa hiba nos pa ta democratico ya nos por escohe nos mesun representantenan. Como Parlamentario bo ta representa tur hende, esnan cu a vota pa bo y esnan cu no a vota pabo paso bo votonan den Parlamento tin consecuencia pa henter e pais. Un cos e Parlamentario por bisa si y esey ta cu MEP definitivamente lo no ta un opcion despues di e trato cu nan a duna e y Parlamentario Mervin Wyatt Ras na momento cu nan a saca nan na mal forma for di partido. Lopez Trompa

bisa di a wordo aserca dor di diferente partido despues cu el a retira for di MEP pero cu no tin nada concreto. Como cu e ta Independiente, dimes e ta wordo aserca dor di su funcion den Parlamento pa cumpli cu e deseo di e pueblo. Un otro rumor cu tin ta circula ta cu e lo por bai tuma over e liderasgo di PPA mirando cu su tata tabata den pasado un pilar di e partido aki, pero segun Lopez Tromp asina leu cu e sa e lider di PPA tey ainda y ta fungiendo normal como lider y no ta muestra cu tin desaroyonan di cu e lo ta bai hala un banda pa hendenan nobo tuma over.